

1 Peterus

Yesus arye wibuka deibuknye, el si Peterus arye, minop talak sekuk yupu

Abuku sekuk deiyoknye bira, Peterus ulamuk. Peterus ara, Yesus arye webuka deibuk mapu, sik 12 nang kan-kan ton ulamuk. Yesus ap, balamrikce, el yupu kekebuka diba tenebukce, dobolbalamuk. Tonda, aminyan talak Peterus ap, Paulus ap, epdareik, Peterus arye Paulus ap, el seklamuk surat nirya ap, weik arye kel kiyamuk (2 Peterus 3:15-16, Galatia 1:18; 2:1-21). Peterus ara, Yahudi yalanye ulamuk bukni, Yunani yupu ton kel kiyamuk. Asurat sekuk talak ara, el ka Silas arye melibuk ura, asurat sekuk. Ara, Peterus arye ayupu laka nyabuk ura, Silas arye sekuka deibuk (5:12). Peterus arye, surat bitinye sekuka, diba tenena ninye dam dopkwetebuk. Abuku ara, minopce sekuk surat. Asurat sekuk deiyok ara, weik aubuk bukni, ton ning ara, 'Diba tenen ninye eibikirye, sik talima melipnamle' tenen, sekuk. Tonda, Allah el kanye aniryuk bico tenepsilirye, melisilye ning, 'Weika arye kel kipnamak' tenen, sekuk. Tonda, 'Tkin ning upsilye bukni, kanye teniltona kum arye, tunimabuka, diba tenena uk unamak' tenen, asurat sekuk.

Yesus arye wibuka deibuknye, el si Peterus arye, minop talak sekuk yupu

1 ¹Na Peterus arye asurat sekeipsene. Yesus Kristus arye, 'Na yupu dobuka peterepra banamle' tenen, wibuka deipnukba, Rasulnye unune. Anggun mutuku si ara, Pontus ap, Galatia ap, Kapadokia ap, Asia tam ap, Bitinia ap bokuka, yuk-yuk ululum ninye ati asurat sekeipsene. Allah arye, 'Na mapu unamak' tenen, teneamsuk touk, anggunce akunum diba teneluluma anya arye, tukwak mutuku ara, tia talak uk ululume. Allah el mapu ululuma anya arye, tukwak mutuku noutamak ara, ninye asik nang atonun ululume. Nun mutuku sirika ara, im deice uka.

²Nun Ni Allah arye minop talak akunum wiamsukce teneamsuk touk, Allah El Dib Kanye arye, anggun talima noutamak malye ning

kum deipsukce, teleb kipdeilisulul deice, Allah arye wibuka deipsuke. 'Wininamak' tenen, Allah arye wibuka deiamsuka deiyok ara, nyapnusine. Ara, 'Yesus Kristus el ining biyuka deice arye, anggun malye ning kum danyaipsilirce, lyepsiliryop ura, el yupu uk talibuka dobolbanamak' tenen, wibuka deipsuke. Allah arye bico tenepsilirye, nun patapsilye ning talye arisulul ning ap, Allah ap kanye dukdongobuka umunce, yuk ninye ap kanye deibuka, teleb ubuka neika unamlulum ap, 'Aning nirya weik upnin banamsil' tenen, Allah morosunune.

Nun Ni Allah ati, el si erebuka, "Fia telebe," nyanamap ati nyabuk yupu

³Nun Deiyoknye Yesus Kristus, el Li Koprop Allah ati, "Telebe," nyabuka, el si fia erenamabe. 'Telebe' tenen, nun malye winina ati, adip aryuk wenebuka opsutu bukni, bico tenepsukce namin kipsuke. Winipsukce, winiryuk ninye atonun akunum kipdeipsukce, fia kam una deiyok ning akunum aripsuke. Winiryuk ninye kipsuka ara, Yesus Kristus dibuk bukni, kam bukeibuka deice arye, el mapu kilisulule. Winisululbuk, nun kanye talima Allah el deice uk deibuka, kam fia unamabe. Wininap ning ati, kanye teniltona kum aniryuk, 'Aning ara, fia dipkoprop unamabe' tenen, kanye deibuka unyabe. ⁴Tonda Allah arye, 'Na mapu unyak' tenen, fia teleb ning arinamsil ning ara, lyuna ap, kum danana ap, malye una ap fia kum uptue. Aning ara kum upmanto. 'Aning ara, im deice arye kintinibuka, 'Na' tenen, deipsuka anya arye, tuba aupsuke. Aning min kum danamsile.

⁵Anggunda, Allah ati diba teneluluma ati, Allah arye, 'Na mapu malye ubicak' tenen, el mikip deice arye kalekuka lelilongosulule. Winitalak arye dipdongobuka, dotalak yanamle talak nirya ara, el mikip arye kalekuka lelisilyebuk, sirya daknamle talak akunum uplyop ura, Allah arye lyen ning akunum kintiniyeiamsuk ati, Yesus aminyan talak tamubuka yalyop ura, lyepnamsile. Atalak ara alyen ning nirya laka daneipnamsile.

⁶Yesus arye tamubuka yanuka lyepsilirye, lyen ning nirya lakak nyapdeipnamsil ning ati ara, weik arye kanye deibuka ululume. Winilulum bukni, winitalak ap, oyanamle talak mitikanun ap, talima winilden ning yala-yala weik usilibuk, kanye imun kanye bobuka ikin unamsile. ⁷Kanye winilden ning usilye ning ara, deiyok nyapnusine. Ara, anggun diba tenebuka, Yesus talibuka umunye ning nirya ara, winilesilyebuk, talima wisipsilye, 'Dipkoprop fia gat uk, dipkoprop ninguk unamsil' tenen, yangalule. Dekna weik ning emas ara, 'Malye ning ubuk ning, kum uptue' tenen, uku dongopmacebuk, malye ning diplyop ura, teleb ubuka delinyak bukni, emas babye kum uptue. Emas ara, dekna weik ning ulul bukni, mitik mambul ninguk ulule. Anggunce diba tenebuka, Yesus talibuka umunye ning nirya ara, weik dekna weik ning atonun, weik mambul ulule. Diba tenelulum

ning winilesilyebuk, akunum teleb uplyop ura, Allah arye nyapdeiplibuk, Yesus Kristus tamubuka lakak yanamle talak ara, Allah arye telebe nyana ap, si erena ap, weik dirina ap, weik si ap, aripsiliry e relinamsile.

⁸ Yesus Kristus ara, minop talak kum elilamlum bukni, el ti kanye aripbuka, anggun kanye talima el deice deililulume. Winitalak babye, el nong kum elilulum bukni, el ti diba tenebuka, el uk talibuka umunye ura, elce anggun talima noutam, kanye deibuka fin-fin kilisulule. Kanye deibuka fin-fin kilisulul ning ara, talye ninye yupu deice arye, nun kum laka nyaptibye. ⁹ Kanye fin-fin ulisulul ning ara, talya ati kum usulule. Deiyok ara, Allah arye, ‘Winamak’ tenen, Allah diba tenelulum ning ara, akunum dololuluma anya arye, weik arye kanye deililulume. Ara, anggun kanye ap, talima ap, kanye ap nirya ara, lyepsiliry teleb ulisulul ning dololuluma ati nyapsine.

¹⁰ Allah el yupu laka nyalamik nang, nabi^a nang ara, Allah bico tenepsiliry talye arisilye ning, lyesulul ning yanamsuka ati, yupu laka nyalamik talak nirya ara, ‘Deiyok ara, moubuka kel biktibye’ tenen, fia moubuka lilibuka dilelamik bukni, Allah arye lyesulul ning deiyok ning ara, atalak moubuka kum kel bikamik. ¹¹ Ara, Kristus El Dib Kanye arye, nabi nang sik talima noutamak yupu laka nyalamik. Laka nyalamik yupu ara, Kristus ikin upnamuk ning ap, ikin ubuk ura, aminyan sirya talak, weik mambul ning, fia teleb ubuka dirina weik ning upnamuk ning ap ati, yupu laka nyalamik. Ayupu laka nyalamikbuk, sik nabi-nabi nang arye, ‘Se ayanamle ning yanamle talak ara ani, ayanamle talak noutamak winipnamle ning ara, ani moubuka kel kiptibye,’ tenelamikce, fia pirlitaklamik. Pirlitaklamik bukni, aning deiyok ara, moubuka kel kum bikmanto ulamik.

¹² Atalak ara, Allah arye el yupu laka nyalamik nang, sik nabi nang ati, sik talima noutam arye laka nyabuk. “Kume, na Dib Kanye arye anggun talima noutamak nyapdeipsilye ura, aminyan talak winipnamle ning ati, yupu laka nyalulum ning ara, anggun winitalak ululum ninye ati kume. Aning ara, aminyan talak unamak ninye ati winipnamle,” Allah arye nyabuk. Allah arye afia teleb kilinamsil ning nirya ara, Allah el im deice fil don nang, sik malaikat babye, ‘Se, Allah arye afil dolye ning ara, fia teleb ulule’ tenen, kanye deibikirye moubuka dinyake.

“Fia teleb ubuka diksukumuk unamlulume,” nyabuk yupu

¹³ Aning ati ara, diksukumuk una ati, anggun kanye moupmunce, ‘Allah el fil uk donamap’ tenen, kintinibuka dina uk unamlulume. Tonda,

^a **1:10** *Nabi, Allah el yupu laka nyan nang* – Allah el yupu laka nyan nang ara, Allah arye, ‘Ninye kekepnamak’ tenen, elce wibuka deiyamak nang ati, el yupu laka nyabukop ura, anang arye, yuk ninye nirya ati, laka nyalbalamik. Anang ara, nabi nang nyanyabe. Nabi nang sik laka nyan yupu nomor 25 dipdelulume.

‘Malye ubibyak’ tenen, kanye moubuka kalikildanamlulume. Aning fia wininamlulume. Allah arye Yesus laka kiplibuk, Yesus Kristus tamubuka yanamle talak ara, bico tenepsiliry, talye uk arinamsil ning ati, ‘Dipkoprop wininamsil’ tenen, diba tenebuka, anggun kanye Allah deice uk delinamlulume.

¹⁴ Yesus min kum diba teneamlum talak noutamak ara, walwal ninye ulamlumce, malye ninguk patalamsukbuk, malye ulamlum touk, ulamlume. Minop talak ulamlum bukni, winitalak ara, aning atonun kum wininamlulume. Aning kum bukni, teleb mapu arye sik ni yapu yupu moubuka kekebikirye, dobolbalamak touk, anggun babye, Allah el yupu kekebuka, el teleb bisik uk dobolbanamlulume. ¹⁵ Anggun yukupsuknye, Allah ara, malye winina tonok ning babye, kum uliry, el diksukum uye touk, anggun babye, anggun malye ning nirya batakuka, anggun unamlulum ning nirya ara, diksukumuk wininamlulume.

¹⁶ Wininamluma deiyok ara, Allah yupu noutam sekuka deiamsuk yupu ara, ani.

‘Allah arye nyabuk, “Na diksukum unye touk, anggun babye, diksukumuk unamlulume,” nyapsuk.’ *(Imamat 20:7)*

¹⁷ Anggun Allah morolulum talak arye, nun Ni nyalulumnye Allah ara, ninye tukwak ninye nirya, sik wininyak ning dipdesiliry, sik wininyak ning atonun yupu bokeipsiliry, wenesulule. Ninye yuk-yuk ulamak touk, yupu bokuka kintinilisulule. Allah arye ninye urasin dipdebuka, ‘Na ka,’ tenena kum aniryuk, nun winilabap touk yupu yuk-yuk bokuka kintinilisulul anya arye, anggun tukwak mutuku tia unamlulum talak nirya ara, ‘Allah elda weik mambule. Malye winibibyop ura wenepnamsile’ tenen, ilil uplibuk fia leibuka diksukumuk unamlulume.

¹⁸ Wininamluma ara, talya ati kume. Deiyok ara, anggun kele, Yesus deksukce, lyepsuk ning ara, talye ning, kum winipnamle ning perak ap, emas ap, atonun ning deice arye kum deksuke. Anggun apu yapu nang arye, “Wininamlulume,” nyabuka, talye-talye peterelamsikbuk, ulalum ning talyamsuka noutam arye, Yesus arye min kum winipmanto ning deice arye, dekuka lyepsuke. ¹⁹ Talye kum ulul ning arye kum deksuk bukni, Yesus Kristus ara, domba yok kwanena ap, nong bol malye una ap, kum wamlye ning atonun ulamukce, el bidamnye ining fia mambul ning deice arye dekuka lyepsuke.

²⁰ Allah arye, aning-aning nirya min kum kwepdeiamuk talak ara, ‘Yesus arye ninye lyepnamle’ tenen, akunum wibuka deibuk bukni, winira sirya talak ara, anggun lyena ati akunum lakak aripsukbuk, kel kibape. ²¹ Yesus fil dopsukce, melisilya deice arye, Allah diba tenelulume. Yesus dibuk ura, Allah arye kam bukeibukce, weik dirina ap, mambul una ap deice arye, ereibuka ati, anggunce Allah ati diba teneplulume. Diba teneplumce, ‘Allah arye wininamsile’ tenen, kintinibuka dina uk

ululum ning ap, ‘Allah elcuk melinamsile,’ tenena ap ara, anggun kanye talima Allah el deice uk deililulume.

²²Ara, Allah el dipkoprop yupu talibuka dobolbalamunya deice arye, malye un ning nirya akunum batakuma anya arye, yuk diba tenena ninye ati, dipkorop kanye deipdanuka, melilana uk ululume. Aning ati ara, fia dipkoprop anggun talima ap, kanye ap, aripdamunce, bico tenebuka, weik arye melinlana uk unamlulume. ²³Wininamluma deiyok ara, Allah arye anggun kanye talima winiryuk ning atonun ubuka aripsuka ara, talye kum ulul ning deice arye kume. Aning kum bukni, Allah el kam ulisulul yupu, min kum uptu ura, fia unamle yupu deice arye, winiryuk ninye atonun ubuka deipsuke. ²⁴“Allah el yupu fia unamle,” nyapsin yupu ati ara, ayupu dipdelulume. Yesaya arye sekeiyamsuk yupu ara ani.

‘Ninye tukwak nang nirya ara, mutmuta atonun unyake. Sik urasin teleb unyaka ap, sikce memenyak ning teleb ning nirya ap, dolku deice kita popmalya ani, kuluplye ura dakalsakalamle touk unyake.’

²⁵‘Ninye nirya ara, wininyak bukni, Allah el yupu ara, tonok ton min kum, kum danamle. Fia ati, aupnamle.’ *(Yesaya 40:6-8)*

Yesaya arye sekeiyamukak peterelamsikbuk, kekelamlum yupu ara, anyapsine.

**“Malye un ning nirya batakuka, Allah el yupu
uk talibuka unamlulume,” nyabuk yupu**

2 ¹Allah el fia ati, upnamle yupu peterelamsika ati, malye winin ning nirya ara, batakanamlulume. Ara, yuk nang ati, yu una ap, ‘Na’ tenen arye, talye nyana ap, ‘Yuk nang ning, na ton doproptinye’ tenen, talima noutamak pataplibuk tenena ap, malye winin ning aupmalye bukni, nong bol deice uk teleb una ap, yuk nang ati talye yupu nyabuka lulundana ap, amalye winin ning yala-yala nirya ara, batakuka batakanamlulume. ²Winiryuk deibice mapu, sik nin yapu moum ati fia patalamle touk, Allah el fia teleb yupu, talima ak wisibuka teleb ulisulul yupu ati, fia patanamsile. Winibuka patapsilye ura, kekebuka dolona uk upmunyop ura, Allah arye lyepsuk ak, el ap talima dukdongobuka umunya ara, fia wisipnin balamya ani, telebuk unamsile. ³Yesus ap, talima dukdongobuka umunya ara, ‘Teleb ulule’ tenen, akunum kel kipmaluma ati, afia unamlulume.

**“Allah arye wibuka deipsuka ati, diksukumuk
unamlulume,” nyabuk yupu**

⁴Ara, winipmanto yupu nyapnusine. Ara, Yesus ara, aik don keil atonun ulul bukni, elda fia Kam Keil ulule. Ninye mutuku-mutuku nirya

arye, ‘Keil talye keil’ tenen, batakلامik bukni, Allah arye Yesus ati, ‘Akeil ara, weik mambule,’ tenebuka wibuka deiamuk. ⁵Anggun babye, kam keil atonun ululuma anya arye, Yesus ap kanye dukdongobuka ululum talak nirya ara, el dopropsilirye, aik atonun dobuka teleb updeipnamsile. Tonda, ‘Allah ap, malye winin ninye ap, ansinibuka neika utibye’ tenen, ansinilina deiyok nang ati, Allah arina deiyok nang atonun kilisulule. Winisilyop ura, Yesus Kristus ap, talima dukdongobuka diksukum umunye deice arye, Allah ati teleb ning arinamlume. Ara asing elinyap ning kum bukni, tonda nong kipman talye ning ati arinamlulum bukni, Allah arye, ‘Aning teleb,’ tenelye ning uk, anggun kanye talima noutam arye arilulum ning, el ti arinamlume. Winipmunyop ura, kanye delinamsile.

⁶Wininamlum ning ati ara, Yesaya arye Allah el yupu noutamak nyabuka sekeipsuke. El domon yupu arye nyabuk yupu ara, ani.

‘Allah arye nyabuk. “Anggun dipdelulume, fia mambul keil tonok, Sion mutuku noutamak wibuka deiamsise. Yata nang do nirya, el ti diba tenebuka akeil deice kanye delinyak nang ara, dipkoprop alye kum dakdanamake. Tonda, na arye aninye ati, fia kum bataknamne,” Allah arye nyabuk.’ (Yesaya 28:16)

⁷Winitalak, anggunce Yesus ati diba tenelulum ninye babye, akeil ati ara, ‘Weik mambule,’ tenelulume. Bukni, sik diba kum tenenyak ninye ati ara, Allah yupu buku Mazmur noutamak arye ayupu nyabuk.

‘Sik aik dona deiyok nang arye, ‘Akeil ara, malye keil’ tenen, batakik ning ara, winitalak weik mambul keil akunum upsile.’

(Mazmur 118:22)

⁸Tonda ayupu dipdelulume. Yesaya arye ayupu sekeipsuke.

‘Akeil ara, ninye balelamice anyak, yan dum duklyop ura, kwelanyake. Tonda akeil arye, yan dum duklyop ura, sakanyake.’

(Yesaya 8:14)

Sik diba tenena kum nang arye, Yesus el yupu kum kekenyakce, talibuka kum dobolbanyak anya arye, ninye arye yan dum duklyop ura, sakalamak atonun, malye uk unyake. Ara, talya ati kume. Allah arye aninye ati, ‘Wininamak,’ teneamuk touk unyake.

⁹Diba tenena kum nang arye, wininyak bukni, anggunda diba tenelulum ninye ara, Allah arye, ‘Na mapu kibikirye, diksukumuk unamak’ tenen, akunum wibuka deiamsuke. Tonda, ‘Na fil uk dokirye, ninye ap, Allah ap, ansinilina deiyok nang unamak’ tenen, wibuka deiamsuke. Anggunda kunuknak noutam atonun, malye ulamluma noutam ulamlumbuk, Allah yukubsukce, dobuka teleb dirinak atonun delilbisuke. Winipsuka deiyok ara, ‘Allah el si erebuka, el ti telebe nyabuka, fia unamak’ tenen, dirinak delilbisuke. ¹⁰Minop ara, fia mambul ninye kum ulalum bukni, winitalak ara, ‘Allah arye el ‘Na’ tenen ati, el mapu akunum kipdeipsuke. Aning atouk,

minopce wenena kum arye, namin kipsilirye, talye melibuka lyesulul ning, minop talak kum dololalum bukni, winitalak ara, aning akunum dololulume.

¹¹ Na kayapu, bico tenesunune. Anggun mutuku sirika ara, im deice ulula anya arye, tukwak mutuku noutamak, ninye asik ninye atouk ubuka ululum talak nirya ara, malye winin ning patasilye ning nirya ara, batakuka lubakilongonamlulume. Amalye winin ning patasilye deice arye, nun kanye talima ap, kanye ap opbisibuka, malye ulisulule. Ati amalye winin ning nirya ara, batakanamlulume.

¹² Sik dib kum tenenyak ninye kan-kan ululum talak ara, anang arye anggun ti, “Anang ara, malye ninye,” nyabuka lululinamsiak bukni, anggun fia dipkoprop diksukumuk ulamunyop ura, anggun teleb ululum ning eipsikirye, Allah dolyanamsil talak ara, anang arye lopdeipsikirye, Allah el si ereipnamake.

**“Ninye deiyok nang, sik amutamak ubuka,
nimalye arye unamlulume,” nyabuk yupu**

¹³⁻¹⁴ Nun Deiyoknye Yesus ati, ‘Malye yupu nyapsikcak’ tenen, weik ninye deiyok nang yala-yala nirya ara, sik amuak bukuka nimalye arye unamlulume. Ara, aning-aning nirya deice tam talibuka ululnye Raja babye, ura el amutamak unyakce malye nang wibuka weneplirye, ‘Teleb nang melipnamle’ tenen, dolkwetelye nang, Gubernur yala nang babye, sik amutamak bukuka nimalye aryuk unamlulume. ¹⁵ Wininamluma deiyok ara, ani. Ara, sik walwal nang arye, talye yupu nyabuka lululinamsiyak bukni, anggun teleb diksukum umunya deice arye, ‘Anang arye malye yupu nyasinyake, yupu sekelongonamlulum’ tenen, Allah arye akunum teneamsuke.

¹⁶ Anggunda, malye winin ning noutamak, Allah arye lyebuka lopdeipsuk nang, diksukum una nang atonun unamlulume. Winibuka unamlulum bukni, ‘Nunda Allah arye akunum lyebuka lopdeipsuka anya arye, nun tenepmabye ninguk, talye luba kibuka unamabe,’ tenena meme. Malye un ning duknubuka kum unamlulume. Allah el yupu kekebuka, el fil uk dobuka, diksukum unyak nang ulamak touk, anggun babye, wininamlulume. ¹⁷ Yata ninye do nirya, si erebuka unamlulume. Anggun, Allah diba tenemunya atonun, yuk diba tenenyak nang ati, bico tenebuka melilana uk unamlulume. ‘Allah ati malye ubibyak’ tenen, leibuka unamlulume. Ninye talina weik Deiyok nang, Raja yala nang nirya ati, si erebuka unamlulume.

¹⁸ Anggun yuk nang ati fil melin nang^b ara, anggun deiyok nang ati nimalye arye, sik yupu kekebuka, sik amutamak unamlulume. Ara, nun

^b **2:18** *fil melin nang* – Yo bok deice deklamik ninye ara, bona weik talin nang arye, bona utotoa talina kum ninye ati, yo bok deice arye deklamik. Deklamikba, abona talina kum ninye arye sik bona weik talininye ati sik fil talya urdemuk dolamik. Tonda, lak len yupu ara nomor 36 dipdelulume.

patapsilye ning tenebuka, nun ti teleb unyaka deiyok nang atibuk kume. Tonda yuk deiyok nang arye anggun ti yu nyabuka, ikin fil deipsikce nang babye, anggun tibuk sik amutamak bukuka nimalye arye unamlulume.

¹⁹Wininamluma ara, talya ati kume. Ara, malye kum unyak bukni, sik deiyok nang arye, ikin ning weik sik nong deice deibikibuk, ikin weik uplibuk unyak nang babye, 'Allah arye kanye deipnamnil' tenen, sikce malye yupu tamubuka kum nyanyake. Talya tunimabuka, sik deiyok nang amutamak nimalye aryuk unyake. Wininyaka ati ara, Allah arye sik ti kanye deililule. ²⁰Bukni, anggun malye upmunyebuk, anggun nong deice ikin ning deipsikce ura, nimalye arye namin kibuka ulamluma babye, Allah arye kanye kum deipnamsile. Ara malye akunum upluma ati, ikin ning anggun nong deice delisinyaka atia. Winipmunyop ura, Allah arye kanye kum delinamsile.

Bukni, anggun teleb-telebuk umunce, deiyok kum upmalyebuk, yuk nang arye anggun nong deice ikin ning deipsikce ura, nimalye arye namin kibuka ulalumop ura, Allah arye kanye delinamsile.

²¹Anggun nong deice ikin ning delisikca babye, 'Namin kibuka nimalye arye unamak' tenen, Allah arye yukupsuke. 'Wininamak' tenen, nyapsuka deiyok ara, nyapnusine. Ara, Yesus Kristus arye anggun lyepnamsuka ati, el nong deice ikin ning weik deibikbuk, donmok ara, 'Sik babye, wininamak' tenen, winipmanto ati lak kipdeipsuke. Ara, 'El nimalye arye, namin kibuka ubuk touk, anggun babye, winamlulum' tenen, lak kipdeipsuke. ²²Yesaya sekeibuk yupu noutamak arye ayupu nyabuk.

'Yesus ara, malye winin ning tonok babye, kum ulamuk. Tonda, tenepce arye talye nyana yupu ara, fia kum nyalamuk.' (*Yesaya 53:9*)

²³Sik malye nang arye, Yesus ati malye-malye yupu nyabuka, el nong deice deipmik bukni, elce ton sik ti tamubuka kum nyabuk. Ikin ubuk ura donmok talak ara, anang ati kwang dakna yupu ton kum nyabuk. Kwang dakna yupu nyana kum aniryuk, elce el bidamnye nong uk Allah ati aribuk. Allah ara, dipkoprop teleb ubuka diksukum yupu uk bokolilulnye. ²⁴Allah arye nun ti, dalubuka opsutu bukni, nun opsutu ning nirya ara, Yesus Kristus arye dobuka, el nong deice deipdayukce, wanwanun yo deice delil bisukce dibuk. Nun malye un ning ati dipsuk ning ara, talye ati kume.

Ara, sik yupa ninye malye un ning kum teneptingce, kum pataptu touk, nun babye, malye ning patana ap, malye winina ap, fia kum arye, 'Diksukumuk unamak' tenen, dibukce lyepsuke. Sikce Yesus ati obikak, dibuk deice arye, nun ti akunum teleb ubuka deipsuke. ²⁵Minop talak ara, anggun nirya domba teleb bisik batakuka, malye bisik kwekdanin balamak touk ulalum bukni, winitalak ara, sik domba weilamak Deiyoknye dam uk tamubuka yangalamak touk, akunum yanuka

ululume. Ara, anggun kanye talima ap, kanye ap, melipsilirye, ‘Malye ubicak’ tenen, dilesilya Deiyoknye dam, akunum yanuka ululuma ati nyapsine.

El akanye ap, el kil ap, sik talima dukdongobuka una ati nyabuk yupu

3 ¹Anggun ninye don kilapu ara, ayupu kekeplulume. ‘Ninye deiyok nang atonun nang ati, nimalye arye sik amutamak unamlulume,’ nyapmasin touk, anggun kilapu babye, anggun akanye yapu amutamak umunce, sik yupu kekebuka, kanye deipdanuka neika dukdongobuka unamlulume.

Wininamluma deiyok ara, anggun akanye yapu diba tenena kum nang aulamtingto ura, anggun teleb umunye ning eibikirye, adeice arye moubuka kel kibikirye, diba tenepnamake. Anggunce anggun akanye yapu ati, “An ton diba teneplyame,” kum nyaldanamlum bukni, sik bidamnang aryuk diba tenepnamake.

²Ara, malye una fia kum arye diksukumuk ulye ning ap, ‘Allah el uk ara, fia mambule’ tenen, el yupu kekebuka dobolbalulum ning ap, sikce aning eibikke ura, moubuka kel kibikirye diba tenepnamake. ³‘Urasin fia teleb kilapu,’ tenepnamsiyak ning ara, nong bol deice winin ning ap, kweiryra ning ap, tonok kume. Ati, potong kouna ap, kweiryra ning dona ap, fia urasin teleb ongon aling ongona ap, winimunye deice arye, ‘Urasin teleb kilapu tenenamsiyak,’ tenena kume.

⁴Aning ara, kum bukni, anggun kanye talima noutam, teleb-teleb ubuka ulamunye deice arye, dipkoprop teleb kilapu unamlulume. Anggun nimalye arye tunimabuka una ap, yupu weik arye nyana kum, kanye dukdongobuka nimalye arye una ap ara, talima noutam usulul ning anya arye, nong bol deice usilye ning, wisi dakiryre suruklamsil ato kume. Aning ara, talima noutam fia usilibuk, Allah el kanye ara, ‘Aning ara, fia mambule,’ teneliryre, kanye deilisulule. ⁵Aning ara, talya ati kum nyapsine. Deiyok ara, minop talak diksukumuk ulamik kilapu arye, Allah deice kanye deibuka ulamikce, sik talima noutam teleb ulamika deice aryuk, urasin teleb kilapu ubuka delilalamika ati, sik ulamik touk, anggun winitalak ululum kilapu babye, atouk unamlulume. Sik minop talak diksukum ulamik kilapu ara, sik nin yapu amutamak fia nimalye arye ulamik.

⁶Sik winilamik touk, Sara babye, el akanye Abraham ati, “Anda na deiyoknye,” nyabuka, el amutamak ulamukce, el yupu kekebuka nimalye arye ulamuk. Aning ati ara, anggun winitalak ululum kilapu babye, anggunce aning-aning nirya ati, ilil kum diksukumuk ulamtumto ura, Sara el kil mapu atouk unamlulume.

⁷Aning atouk, anggun akanye yapu babye, anggun kilapu ap, talima tonok dukdongobuka neika unamlulum talak nirya ara, anggun kilapu

sik pataplye ning moubuka tenebuka, melinamlume. Tonda, ‘Nun kilapu ara, mikip mitik ning,’ tenepmunce, Allah arye bola koplobuka, kam fia una deiyok ning talye aresilya ara, ‘Nun ap, nun kilapu ap, neika dolonamabe,’ tenenammlume. Winibuka unamluluma deiyok ara, anyapmasin touk dipkoprop ulamunyop ura, anggun Allah ati morolulum talak nirya ara, aning-aning nirya arye kum sekdongopsutue.

“Teleb ubuka umunye bukni, ikin ning delisinyake,” nyabuk yupu

⁸Anyapmasin yupu sirya dakna ning ati nyapnusine. Anggun nirya ara, tonok kanye bobuka, talima dukdongobuka, teleb-telebuk ubuka neika unamlulume. Anggun weitcapu silip tonok kanye tenebuka, kanye delilanyakce, neika ulamak touk, anggunce yuk nang patalye ning ati, bico tenebuka melinamlume. Anggunce, yuk nang anggun ikin usilye ning ati, ‘Se aning ara, mambule,’ tenebuka bico tenelanamlulume. Tonda yuk nang sik amutam umunce, nimalye arye neika unamlulume. ⁹Yuk nang arye anggun ti malye upsikcop ura, tamubuka kwang dakana meme. Tonda, yuk nang arye anggun ti, yu bobuka malye yupu nyapsikcop ura, tamubuka sik ti malye yupu kum nyalanamlulume bukni, “Allah arye, “Teleb ulinamsile” tenen, Allah moronamsine,” nyabuka, teleb yupu uk tamubuka nyanamlulume. Anggunce yuk nang ati, “Teleb yupu nyalinamak” tenen, Allah arye wibuka yukupsuk anya arye, winamlumop ura, Allah arye teleb ulinamsile.

¹⁰Anyapmasin yupu deiyok ara, Mazmur yupu noutamak sekik ning ara, ani.

‘Yata ninye do nirya, “Teleb-teleb ubuka fia unamap” tenen, pataplye ninye ara, sik bidamang moubuka kalikilakiryte, tenepce arye talye yupu nyana ap, malye yupu nyana ap, fia kum wininamake.

¹¹Sik adip aryuk, ‘Malye un ning nirya batakuka, diksukum winin ninguk unyakce, ninye nirya ansinibuka, teleb ubuka neika unamap’ tenen, pi dobuka fil donamake.’

¹²Wininamaka deiyok ning ara, ani. Ara, Allah el yupu kekebuka diksukumuk unyak ninye ara, Allah arye fia melibuka disulule. Tonda, sikce el ti moronyak ning nirya ara, fia moubuka kekelule. Bukni, sik malye-malye unyak ninye ati ara, Allah arye sik yupu sekliryte, batakalongolule.’

(Mazmur 34:12-16)

¹³Teleb winin ninguk patapsilibuk, anyuk talibuka ulamunyop ura, yata ninye arye, ikin ning anggun nong deice deipsikirye, malye kipnamsiyak do? ¹⁴Bukni, anggun telebuk ubuka upmunyop ura, sik malye nang arye ikin ning anggun nong deice deipsikcop ura, kanye deibuka, ‘Teleb uka,’ tenenammlulume. Allah arye kanye deipsilirye, anggun ti teleb updeipnamsil atia. Yata ninye do nirya, sik ti ilil kum unamsile. Tonda sik diba tenena kum nang arye ilil ulul ning ati ara, anggun diba tenena ninye arye aning ati ilil kum unamsile.

¹⁵ Ilil kum unamsil bukni, anggun talima noutamak ara, 'Yesus Kristus na Deiyoknye el uk unamnile' tenen, wibuka kintinilinamlulume. Anggun kanye talima ara, Yesus deice uk delinamlulume. Sik asilenamsiak nang nirya ati ara, 'Allah arye Iyepnamnil' tenen, 'El deice kanye delinuna ara, laka nyabuka deipnamne' tenen, kintinilinamlulume. Yesus el Iyen yupu laka nyanamlum bukni, yuk nang nirya ati, si erebuka, nimalye aryuk nyanamlulume.

¹⁶ Allah diba tenelulum ning, laka nyabuka deilinamlum talak nirya ara, weik yupu weika arye nyana kum bukni, yuk nang nirya ati, si erebuka nimalye arye, laka nyanamlulume. Yesus Kristus talima dukdongobuka teleb ubuka, diksukumuk unamlulum bukni, malye yupu nyabuka lululinamsiak ninye ara, 'Ailye upnamle' tenen, anggun kanye talima noutamak ara, malye ning duknuna kum arye, diksukumuk unamlulume. Winilulumop ura, yu arye lululinamsiak bukni, anggun ap, Kristus ap talima dukdongobuka ululumba, teleb winin ning eipsikcop ura, alye unamle.

¹⁷ Allah arye, 'Wininamak,' tenesilye touk, malye una kum bukni, telebuk ubibyop ura, yuk nang arye nun nong deice ikin ning deipsikcop ura, ara telebe uka. Bukni, malye winipbibya deice arye, ikin ning nun nong deice deipsikcop ura, ara malye uka. Teleb ning ara, deiyok kum upmalibuk, ikin ning nun nong deice deipsikcop ura, 'Aning ara, telebe uka,' tenepnamabe. ¹⁸ 'Malye un ninye ara, ansinibuka Allah ap, talima dukdongobuka unamak' tenen, fia diksukum unanye, Yesus Kristus arye, nun malye un ninye dekna ati, like tonok talak aryuk dibuk. Yesus ara, ninye nong atonun dayukce ulamuka ani, obikop ura dipmok bukni, dibuk ura, Allah El Dib Kanye mikip deice arye, Yesus ati tuba tamubuka kam bukeibuk.

¹⁹ Ura, kam bukeibuk ura, el kanye kam ulamukce, sik dilamikba, Allah arye wenen ak dongolamuk ninye, sik dam binuka, Allah yupu peterebuk. ²⁰ Allah arye wenen ak dongolamuk ninye ara, minop talak Nuh ulamuk talak noutamak ara, Allah ati yaniltalamik. Sikce Allah ati yaniltalamik talak ara, tukwak mutuku-mutuku nirya, weik mekwen deipnamuk talak atia.

Atalak ara, Nuh birye weik mek lia yo kintinibuka dolamuk talak noutamak, Allah arye, 'Aninye dib tenepting' tenen, nimalye arye ulamu bukni, malye uk ubuka Allah ati yaniltalamik. Nuh birye weik mek lia yo akunum dobuk ura, ninye weik kum bukni, Nuh el mapu nirya nukukap, pin barye ninye uk mek lia yo aik fum wekik ura, weik mekwen deibukce, mekwen deice amek lia yo dobuka erepdobuk deice, Allah arye aninye uk Iyebuk. Yuk malye ulamik ninye nirya ara, mekwen arye dibuka dibik.

²¹ Weik mekwen deice aninye Iyebuka ara, 'Dip tenepnamak' tenena ati upsuke. Ara, diba tenebibuk, Allah Iyepsilyop ura, mek dongolamsiaka

atonun ulule. Dib tenebibuk, mek dongosinyaka ara, nun nong bol deice nininga usilye ning, mek liksiliry, kum danalisulul bukni, mek dongopnusikke talak ara, na tenena kum arye, ‘Allah arye lyebuka melipnilibuk, malye un ning nirya batakuka diksukumuk unamne’ tenen, lak akarye nyanyabe. Mek dongolamsiaka deice arye kum lyesulul bukni, Yesus Kristus dibuk ura, Allah arye, Yesus kam bukeibuka deice aryuk lyesulule.

²² Allah arye, Yesus Kristus kam bukeibuk ura, ila tamubuka im deice welebukce, Allah el sirik taruk tam bukukce ulule. Bukukce eitam uk uplibuk, Allah el im deice fil don ninye, malaikat ap, tukwak ninye deice tam unyakce weik deiyok nang atouk, im deice unyak ninye ap, tonda tukwak mutuku noutamak unyak isa mer nirya ap, ura, yata mikip ning do nirya, Yesus el amutamuk unyake. Yesus ara, weik mikip weik uliry, aning yala-yala nirya deice tam uk ulula atia.

Winiryuk kam una ati nyabuk yupu

4 ¹ Aning ati ara, Kristus ninye nong atonun dayukce ulamuk talak noutamak ara, el nong deice ikin ning weik deililamik ura, kanye imun kanye bobuka ulamuk. Yesus ara, winibuka ulamuka anya arye, anggun diba tenelulum nang babye, el ulamuk atonun, akanye uk tenebuka unamlulume. Ara, yata ninye do nirya, sik nong deice ikin uplibuk, kanye imun kanye bobuka unyak ninye ara, malye un ning tonap, kum patalyeba batakalongonyake. ² Malye un ning akunum batakanyak ninye ara, kanye imun kanye bobuka, akunum ulamik ati, sik tukwak mutuku tuba unamak talak noutamak nirya ara, ninye talima ak, malye un ning pataplibuk kum wininamake. Malye un ning pataplibuk, ‘Malye upnuyap’ tenen, kum unyak bukni, Allah arye, ‘Wininamak,’ tenesulul ninguk tenebuka, aning uk talibuka diksukumuk unamake.

³ “Anggun babye, wininamlulume,” nyapmasina ara, talya urdem ati kum nyapne. Anggun kele, sik diba kum tenenyak ninye arye, malye-malye wininyak ning ara, minop talak weika arye akunum ulalum bukni, winitalak ara, aning nirya ara, akunum batakmalume. Aning ati ara, amalye un ning tonap, fia kum wininamlulume. Sik diba tenena kum ninye arye, malye-malye wininyak ning ara ani. Sikda, kil talye yona ap, ubula dona ap, malye un ning patana ap, kanye wangalamak mek weik arye dina ap, weik kwalina kwalibikirye malye-malye ubuka kouldana ap unyake. Tonda, sik puturubuka memenyak ning do, isa mer do, talye ning si erenyak ara, Allah arye, ‘Aning na like,’ tenelule.

⁴ Sik malye-malye ubuka wininyak ning, yala-yala weik unyak bukni, anggun diba tenelulum nang arye, neika kum umunyop ura, amalye un ninye arye, ‘Yata ati, nun ap, talye luba kibuka malye kum unyap do?’ tenen, yu ubuka malye yupu weik arye, anggun nong deice delisinyake.

⁵Winisinyak bukni, sik malye-malye ulamice ning ati ara, sik bidamang nang arye, adip aryuk Allah ati, “Nun malye ulamubu ning ara ani, ani,” nyabuka, laka nyanamake. Allah arye, ‘Kam tuba unyak ninye babye, unum diplamik ninye babye, yuk-yuk bokuka deipniryen wenepnamne’ tenen, akunum kintinipdeibuka ulule. El tenepliyen talak arye, yupu bokeipnamsile.

⁶Yesus arye akunum diplamik ninye dam binuka, Allah el laka teleb yupu peterelbiyuka deiyok ara, nyapnusine. Ara, ninye tukwak ninye atonun ubuka ulamika anyar ye, ninye nirya malye ubica deice dibilamak touk, anang babye, akunum diamik bukni, sik kam ulamik talak ulamik ning ati, Allah arye bokuka wenepnamle. Bukni, diba tenelamik nang babye, diamik bukni, Allah fia kam ulye touk, diba tenebika ati, sik nong dibik bukni, sik kanye fia kam unamak. ‘Wininamak’ tenen, Yesus el ninye lyen yupu peterelamikbuk, anang arye diba tenelamik.

**Allah arye, ‘Na fil donamak’ tenen, mambul fil dona
deiyok ning talye arisulula ati, nyabuk yupu**

⁷Aning-aning nirya sirya daknamle talak akunum dam upsil ati, fia moubuka tenepmunce, teniltona kum arye, ‘Malye ubibyak’ tenen, moubuka kalikilanamlulume. Winibuka upmunyop ura, Allah ati moronamlulume. Moubuka kum kalikdamunyop ura, Allah ati teleb nyabuka kum moroptume. ⁸Anyapmasin ning nirya wininamlulum bukni, weik mambul ning ara, winira nyapnusine. Anggun nirya arye, yuk diba tenena ninye nirya ati, fia dipkoprop talima aripdamunce, bico tenebuka melilana uk unamlulume. Yuk nang ati fia bico tenebuka melipmunyop ura, sik anang malye wininyak ning ati ara, talye luba kibuka mangkau kipnamlulume. Yuk nang ati fia bico tenebuka, kum melipmunyop ura, sikce malye updeipsikce ning ati, tuba tenena uk unamlulume.

⁹Anggunce yuk ninye ati sik din ap, aik manak ap, si erebuka yukulonamlulume. Wininamlum talak ara, malye yupu nyabuka, lik kanye bona kum arye, teleb kanye bobuka unamlulume. ¹⁰Allah arye anggun nirya yuk-yuk ati, ‘Na mambul fil donamak’ tenen, ‘Fil dona deiyok ning mikip akunum talye aripsukbuk, doproplum ning deice arye, yuk diba’ tenen, ninye ati melilana uk unamlulume. Allah arye talye arisulul fil dona deiyok ning ara, yala yuk-yuk awabsilya deice arye, yuk ninye ati, batakna kum arye fia melinamlulume.

¹¹Winipmanto ning ara, yatanye do, Allah yupu nyalulnye bira, Allah el dam yaturye, nyaptubuk elce ila tamubuka nyapsutu touk, fia mikip deice arye peternamsile. Aning atonun, yuk ninye ati, melibuka fil dolulnye bira, Allah arye el mikip arisilya deice arye, yuk ninye ati

melibuka fil donamle. Allah arye, ‘Na fil donamak’ tenen, talye arisilye fil dona deiyok ning deice arye, Yesus Kristus ap, kanye dukdongobuka umunce, anggun wininamlulum ning nirya ara, teleb ubuka unamlulume.

Winibuka umunyop ura, yuk nang eipsikirye, Allah el si weik arye erebikirye, el ti, “Telebe,” nyanamake. Ninye mutuku-mutuku nirya arye, Allah el si erebikirye, ‘Weik mikip ululnye bira, Allah el uk,’ tenebuka, ‘Fia unamak’ tenen, Allah moronune. Akunuma.

Yesus diba tenemunyebuk, yuk nang arye ikin ning anggun nong deice deilinamsiaka ati, nyabuk yupu

¹²Na kayapu na kanye delisunune. Ikin ning weik anggun nong deice deipsikce ura, kanye imun kanye bobuka, umunye talak noutamak ara, anggunce, ‘Se, aning kum winipsutue. Kum winipmanto ning upsile’ tenen, mambul kanye bobuka kum unamlulume. ¹³Mambul kanye bobuka, ‘Se,’ kum tenenamamlulume bukni, Yesus Kristus nong deice, ikin ning deibikbuk, ikin kanye bobuk touk, nun babye, atonun, ‘Ikin ning nun nong deice deipsikca babye, telebuka’ tenen, kanye weik arye delinamlulume. Yesus ikin ning weik ulamuk touk upsiliba, kanye deibuka umunyop ura, aminyan talak Allah arye, Yesus el weik mambul ulul ning ap, fia teleb-teleb ubuka ulul ning ap, dirina weik uplibuk, lakak nyapnamsil talak ara, kanye fia weik arye deibuka, fin-fin asa unamlulume.

¹⁴Yesus Kristus diba tenebuka, el yupu kekebuka dobolbalamunye deice arye, yuk ninye eipsikirye, yu bobuka malye yupu nyapsikcop ura, kanye delinamlulume. Ara, ‘Nunda mambule, Allah arye nun ti teleb ulinamsil’ tenen, kanye delinamlulume. Ara, talye ati kume. Allah El Dib Kanye teleb ubuka dirina weik ulirye, anggun talima noutamak ulula anya arye, kanye deibuka unamlulume.

¹⁵Yata malye winin ning do nirya, ninye oltakana ap, ubula dona ap, yuk fia malye una ap ara, ‘Yuk nang ara, malye unyak do, teleb unyak do?’ tenen, dipdebuka minina yupu nyabuka bana ap babye, winipdebuka anggun nong deice ikin ning delisinyaka deiyok ning ati, anirya fia kum wininamlulume. Ikin ning anggun nong deice delinamsiaka ara, deiyok kum wablyop ura, telebuk bukni, malye winipmunyak, deiyok dipkoprop wablyop ura, ara malye ati nyapsine.

¹⁶Amalye winin ning nirya kum wininamlulum bukni, Yesus diba tenepmunce, el yupu kekebuka dobolbalamluma ati ara, yuk nang arye ikin ning, anggun nong deice deipsikcop ura, alye kum unamsile. Alye kum upnamsil bukni, Allah lyepsukce, el mapu kipsukbuk, Kristen ninye nyasinyaka ati, ‘Aning ara, fia teleb’ tenen, Allah arye winipsuka ati, “Telebe,” nyabuka, el si erenamamlulume.

¹⁷Allah arye ninye mutuku sirya im sirya nirya ati, yupu yuk-yuk bokeiplirye wenepnamla ara, el mapu kan-kan arye deiyok koupnamla

anya arye, ikin ning anggun nong deice deipsikce talak ara, kanye deibuka, Allah el si uk erenamllulume. Tonda, el mapu kan-kan arye deiyok koupsilye ura, mitik ikin usilye bukni, aminyan daknamle talak ara, diba tenena kum arye, Allah el laka teleb yupu ati, yaniltanyak ninye ati ara, yupu bokeiplirye wenepnamle ning ara, weik mambule. Sik fia ikin weik unamake. ¹⁸Aning atonun, Allah yupu noutamak, buku Amsal deice sekik ning ara, nyapnusine. Ara,

‘Diksukum ubuka unyak ninye ara, ikin ulya deice arye diba tenenyakbuk, Allah arye lyelula anya arye, sik malye winin nang arye, ‘Allah elda talinye,’ tenebuka, el yupu yaniltanyak ninye ati ara, yata wiribuka arye, dib teneptingbuk lyeptu do? Kume, kum lyeptumle.’ *(Amsal 11:31)*

¹⁹Aning ati ara, na kayapu, Allah arye teneamsuk touk, malye nang arye ikin ning anggun nong deice deipsikcop ura, teniltona kum arye, anggun kwepdeisuknye Allah ati, anggun nong ap, anggun kanye talima ap, anirya dobuka, Allah el deice delinamlulume. Anggunce, anggun bidamang nong ap, kanye ap, Allah ati aripmunyop ura, batakna kum, teleb un ninguk ubuka, fia diksukumuk unamlulume. Nun kwepdeisuknye Allah ara, fia batakna kum, melibuka dina uk usulule.

Allah yupu aik talina deiyok nang ati nyabuk yupu

5 ¹Anggun kan-kan unyak ati, Allah yupu aik talina deiyok nang ati, ayupu ton nyapnusine. Ara, na babye Allah yupu aik talina deiyoknye birye, na nyapnusin yupu kekebuka, ‘Wininamlulum’ tenen, moropsine. Tonda, Kristus nong deice ikin ning deibikbuk donmok ani, obikbuk dibuka ara, na asing arye akunum eipse. Tonda, Yesus tamubuka yanamle talak, Allah arye weik teleb ubuka mambul ning ap, dirina weik ap, upnamsil talak ara, na ap unamabe. Aning nirya wininye deice arye, na Peterus arye moropsine.

²Domba basam weina deiyok nang arye, sik domba basam ati bico tenebuka, teleb ubuka weilamak touk, anggun babye, Allah el mapu sik amutamak unyak ninye ati, bico tenebuka nimalye arye melinamlulume.

Ara, sik amutamak unyak ninye ati, ‘Sik kanye malye ubicak’ tenen, melipmunce, ‘Kalikuka dilanamlulum’ tenen, nyapsine. Wininamluma ara, ‘Na lik,’ tenenun bukni, ‘Allah arye fia pi donilya ati, wininamne,’ tenena kume. Aning kum bukni, Allah arye, ‘Na mapu melina ati teniltona kum arye, kanye deibuka melinamak’ tenen, ‘Patalul ak tenesilye touk winamlum’ tenen, nyapsine. Tonda, ‘Yo bok weik aripsiting ak, teleb ubuka utibye,’ tenena kum arye, kanye deibuka talye luba kibuka melilanamlulume.

³Tonda, Allah arye, ‘Na mapu melinamak’ tenen, anggun amutamak deipsuk ninye ati, utenamlulume. Ara, ‘Nun teleb-teleb ubuka

diksukumuk winilamepyebuk, eipsikirye sik babye atonun diksukumuk unamak' tenen, lagakilin nang atonun unamlulume. 'Nada weik mambulnye' tenen, kanye erebuka anggun amutam unyak ninye ati, kum yaninamlulume. ⁴Anyapmasin touk akunum winipmunyop ura, nun Domba basam weina Deiyouknye atonunye, Yesus Kristus tamubuka yalyop ura, elce anggun ti, fia teleb mingne ning, fia teleb ulirye min kum danmanto kum ning aripsiliba, dopropramlume.

Sik wisi danana kum arye, kam nang atonun nang ati nyabuk yupu

⁵Asurat deice arye, "Yuk nang ati, nimalye arye sik amutamak unamlulume," nyapmasin touk, anggun wisi danana kum arye, kam nang atonun nang ati, ayupu nyapsine. Ara, sik wisi nang amutamak umunce, sik yupu kekebuka nimalye arye unamlulume. Buku Amsal yupu noutamak sekeipsik yupu aupmala ati nyapsine. Ayupu ara ani.

'Sik kanye erebuka, dildanyak ninye ara, Allah arye aninye ati bataklirye sik yupu sekelule. Bukni, sik kanye darabuka, talima nimalye arye amutamak unyak ninye ati ara, bico tenepsilirye, talye luba kibuka melisulule.'

(Amsal 3:34)

Ayupu tuba awamsuka ati, anggunce yuk ninye nirya ati, anggun bidamnye kanye darabuka, talima nimalye arye teleb ubuka unamlulume.

⁶Aning ati ara, Allah el mikip fia weik ululnye, el amutam bukuka, anggun kanye darabuka, talima nimalye aryuk unamlulume. Winibuka umunyop ura, Allah arye tenepsuk talak akunum uplyop ura, anggun dobuka ereipnamsile. ⁷Allah arye anggun nirya ati, bico tenepsilirye, fia melisulula anya arye, anggunce, 'Se, yata wiripnuyap do?' tenen, imun kanye bobuka, teniltona uk usilye ning nirya ara, Allah el deice uk delinamlulume.

⁸Ara, yuk yupu ton nyapnusine. Anggunce anggun bidamnye ati, 'Malye ubibyak' tenen, kanye moupmunce kalikildanamlulume. Tonda, leibuka unamlulume. Isa Mutuku Dongonye ara, anggun oldan nang atonun usulule. Elda, singa do, bai kam do, atonun, 'Yata ning obuka diptinye do?' tenen, kalikinmalirye, obina yana kibuka kalikilsulule.

⁹Winisulula ati, lik tenebuka bisipmunce, malye kinamlulume. Ara, anggun diba tenelulum touk, mutuku-mutuku nirya diba tenenyak ninye ara, anggun ikin usilye touk, aninye nirya babye, ikin ulule. Aning ara, anggun akunum kel kiyamluma ati, anggun akunum diba teneamlum ning tunimabuka, talibuka umunyop ura, Isa Mutuku Dongonye ati, lik tenebuka, bisipmunce malye kinamlulume.

¹⁰Winibuka umunye talak noutamak arye, ikin ning ton upsilyop ura, Allah elce anggun ti, teleb kipdeipsilirye, 'Darapdongobuka unamak' tenen, mikip aripsilyop ura, fil fia palibuka dona ati deiyok ning

arinamsile. Allah arye, ‘Sik ap, Yesus Kristus ap, kanye dukdongobuka unyaka deice arye, fia kam unamake. Teleb arye dirina kan-kan ak, na ap dukdongobuka neika unamap’ tenen, yukupsuke. ¹¹Fia minop talak nirya arye, mikip ulirye aning-aning nirya talibuka, malye kibuka batakanamlanye bira, Allah el uka. Akunuma.

Surat sirya dakana ati, “Telebe,” nyabuk yupu

¹²Silas melipnuka deice arye, abumang surat ara, na Peterus arye sekeipsene. Na kwit Silas ara, diba tenebuknye anya arye, na ti kum batakanululce, melinululba, nun ap, neikak neika fil donyame. Elda, na weit atonun unulule. Asurat sekeipsina deiyok ara, anggun talima barina ati sekeipsene. Tonda, Allah arye, ‘Na fil donamak’ tenen, talye arisilya fil dona deiyok ning ap, Allah el kanye aniryuk talye melisilye ning ap ara, ‘Dipkoprop ninguk, akunum laka nyapsile tenenamak’ tenen, asurat ara, sekeipsene. Anyapmasin yupu nirya ara, dipkoprop anya arye, ayupu talipmunce, tunimabuka unamlulume.

¹³Allah arye anggun ti, ‘Na mapu unamak’ tenen, wipsuk touk, Babilon mutuku wibuka deiamukbuk, diba tenenyak ninye arye, anggun yuk mutuku ululum nang ati, “Telebe,” nyasinyake. Aning atonun, na mi Markus arye anggun ti, “Telebe,” nyapdeipsuke. ¹⁴Anggunce yuk diba tenenyak ninye ati, fia dipkoprop bico tenebuka, taruk aripdamunce, kildanamlulume. Anggun ap, Yesus Kristus ap, talima dukdongobuka umunye ninye nirya ara, ‘Kanye deipdamunce neiktoto teleb ubuka unamak’ tenen, Allah morosunune.

Telebe, na Peterus arye asurat sekeipsene.
Asukum anyuk deipne.